

四庫全書

集部

欽定四庫全書

集部
幔亭集卷
五四

詳校官中書臣徐志晉

侍讀臣孫球覆勘

總校官庶吉士臣倉聖脉

校對官主簿臣汪日贊

謄錄舉人臣曹夢齡

欽定四庫全書

幔亭集卷四

明 徐燾 撰

五言聲詩

咏古鏡

青銅留美質玄錫出良工
剝蝕殉秦塚悲歡照漢宮
挂壁菱花豔藏匣桂輪空
佳人時拂拭莫使素塵蒙

咏百花畫帳

羅帷圖百卉晏寢自生香不羨雕欄艷猶如金谷芳嬌
枝沾暮雨弱幹耐秋霜更有雙連理夜發合歡牀

咏薰爐

範金呈麗飾長向蘭閨執籠袖玉肌溫薰牀珠被熟永
夜焰常燃殘更芬不滅佳人夢乍醒枕畔添香屑

咏美人晝眠

金釵斜欲溜玉枕倦相依曹騰含媚眼展轉皺羅衣汗
沾香粉膩慢隔黛痕微夢只縈閨閣不逐楚雲飛

咏美人理髮

犀梳流半月，蟬鬢亂濃雲。
釵梁却巧飾，膏沐散餘芬。
垂肩遮寶珥，委地拂羅裙。
新作盤龍結，含笑問夫君。

咏美人觀畫

國色看如畫，丹青疑是真。
誰能分麗質，各欲競丰神。
江濱有兩艷，下蔡見雙身。
只恐朱顏謝，不及卷中人。

題畫鶴

在陰胎化質，縑素寫珍禽。
差池出玄圃，淒切逐瑤琴。
凝

霜時振羽警露有餘音乘軒雖竊寵終銜恩遇深

題畫鹿

畫圖呈瑞應靈物著天休浮江同濯濯呼侶各呦呦青
莎騰或倚豐草伏還游蒼玄幾變色遐算踰千秋

賦得欲笑翻成泣

悲欣無定態啼笑一時并粉痕歡眼注鉛水嫵容生兩
犀方奮齒雙筋忽吞聲誰云射雉樂翻作泣鮫情

七夕咏牛女

銀河低綵幔珠箔捲針樓星丸彈靈鵲雲錦幙牽牛歡
憎今夕促淚續去年流何當延兔影長將鳳駕留

美人篇戲贈陳叅軍

蘭夢方徵吉傾城得細君纖看眉上月濃愛鬢邊雲聽
琴猜斷索織錦辨迴文共誇新婦好真可配叅軍

和陳叅軍送客未還閨中有望

別雖無百里情亦似三秋薰香虛侍寢看月怯登樓心
慵朝鏡掩望切晚妝留知君南浦淚不獨送人流

為屠田叔太守新姬催妝

燈光滿九衢
弦筦待名姝
羞嗔夫婿促
嬌倩侍兒扶
鬢濃耀寶飾
珮響按羅襦
含顰疑有態
歛色看成都
欲泣聲先顫
將行步復須
梁驚棲玳瑁
枕怯索珊瑚
除釵勞屢喚
近帳費低呼
情通呈臉暈
語澁靜唇朱
蘭膏薰祀闥
香氣郁流蘇
展轉動金釧
綽約見氷膚
使君今有婦
五馬不踟蹰

幔亭集卷四

欽定四庫全書

幔亭集卷五

明 徐燠 撰

五言律詩

出塞曲

羽檄交馳急橫戈賦遠征
五更邊地角雙淚漢臣纓
夜月關山影秋風隴水聲
何時安絕漠歸去報承明

窮冬生朔雪寒色滿交河
絕塞人烟少荒城戍角多
關

山同漢月部落半羌歌欲破匈奴膽君王莫許和

陌上桑

賤妾是羅敷條桑向路隅捲衣伸玉腕掩袂謝金夫
幹弱搖絲籠枝繁罩繡襦蠶飢歸去急五馬枉踟蹰

巫山高

宮殿傷蕪沒峰巒入杳冥猿聲經峽慘山色近湘青
神女魂何處襄王夢已醒朝昏見雲雨猶自想精靈

梅花落

繁花生絕塞春至幾枝空舞雜梁園雪飄隨庾嶺風妝
臺香點砌官閣影辭叢少婦高樓上含悽曲調中

折楊柳

別時曾一折羌管不堪聽愁鎖眉同翠嬌迴眼共青征
途悲雨雪古驛望流星却恨飛空絮隨波化作萍

關山月

一片關山月悲歡望不同穹廬光照海沙磧影連空輪
滿開秦鏡弦斜倚漢弓年年三五夜魂斷玉樓中

隴頭水

秦川分兩水
嗚咽不能休
飲馬水猶凍
磨刀血半流
東西隨隴坂
遠近入邊州
萬古聲無盡
惟添征戍愁

紫騮馬

蹀躞橫行意
悲鳴戀主身
金鞭垂漢月
玉勒控邊塵
影絕追奔易
蹄高轉戰頻
不辭流汗血
未可事和親

銅雀伎

銅臺遺令在
玉座主恩非
舊曲流哀管
餘香散舞衣
總

惟空寂寞羅綺夫光輝日日西陵望君王歸不歸

送人赴安西

離亭征馬嘶送子赴安西後會知何日前途方鼓鼙天
寒白草瘦沙濶黃雲低所惜同心遠能無心慘悽

題方廣巖廨院

叅禪覓野寺涼月滿空山行到叢林裏溪流隔幾灣老
僧擁衲坐孤鶴聞鐘還回首來時路渺茫烟靄間

塞上逢故人

胡笳聲正喧一騎向秋原
偶爾聞鄉語因之傷旅魂
停鞭問姓氏掩淚叙寒暄
未盡悲歡意沙場日又昏

送僧還山

深林長閉關歲久欲西還
落日人烟少秋風梵磬聞
錫飛孤鶴外衲過斷雲間
應嘆無期別相尋何處山

元夕集宗少府宅

勝地春光早開尊卜夜驩
更深銀燭短風細玉簫寒
露氣凝疎幌花陰罩畫欄
六街冶遊子香霧撲雕鞍

令節逢元夕春光此地偏竹枝遊女唱桂酌主人傳漸
覺銀河墜還驚珠斗懸悠然歸路晚萬井散燈烟

溪行

空山收晚照秋色滿川原碁枰誰家婦雞豚何處村叢
林喧怪鳥絕壁挂孤猿白髮高堂上遙遙正倚門

重宿靈源洞懷珠上人

重借蒲團宿吾師已度杯烟霞虛白社衣鉢入黃梅猶
憶無生偈空餘般若臺靈源今夜月依舊照蒼苔

送陳平夫歸六溪

送爾出關門潮生野渡喧
離心數行鴈愁思一聲猿
月暗迷前浦林疎見遠村
今宵燈影裏相憶倍銷魂

亂後經電白縣有懷故園

一夜攬搶落東南
乍息兵黃雲依舊壘白骨委孤城
八口蠻烟路千家野哭聲
故園殘月影偏向馬頭明

樵川道中

停舟當薄暮古寺報昏鐘
茅店斜臨水柴門半倚松
雲

蘿催暝色霜葉老秋容片月飛清影寒山翠幾重

送鄧郡丞擢河東轉運

征馬忽聞嘶飛花趁馬蹄一官司斥鹵萬里隔雲泥路
入潯沲近城連恒嶽低知君纔駐節名已震關西

舟次小箬溪遇邵廣文夢弼話別

邂逅白雲邊停橈一問玄去沽桑落酒來醉廣文瓊月
色催更拆霜花壓釣船相逢俱逆旅明日各風烟

劍津夜泛

夕翠飛丹壑，蔥龍色不分。
神龍前代化，山鬼隔村聞。
露清殘月流星入，斷雲溪邊高閣在何處。
遇雷君

度何嶺憶家

鄉淚正紛紛，猿聲到處聞。
孤峰遙聳翠，怪石自成文。
憶弟吟春草，思親指白雲。
投繻向關吏，何意學終軍。

塔嶺道中

樹老根盤鬱，峰奇勢不齊。
單車穿宿莽，雙嶽夾清溪。
古驛喧猿語，荒郊印虎蹄。
王孫歸未得，愁見草萋萋。

仙霞曉發

早起肅行役寒威何太嚴
防身惟短劍沽酒有長髯
故國山河盡愁心日夜添
雞聲催出客殘月掛茅簷

度西陽嶺

絕巘疑無路披蓊霧裏行
千尋皆鳥道四壁半猿聲
田父扶犁出山僧倚錫迎
停驂聊買醉霜月滿孤城

舟次龍丘遇尹光祿留飲賦謝

黑髮朝叅懶聽松枕石眠
胸中才八斗門下客三千
望

氣關常紩揮毫草正玄自慚同侶笑休覓孝廉船

西湖立春

春色薄城陰東風到武林暖回鄒子律病作越人吟兒
女他鄉淚鶯花故國心西湖有狂客相對酒杯深

王百谷招飲半偈菴

歲晚過吳市飄零念此身投君三指刺醉我百壺春名
下無虛士天涯有故人相逢談半偈江上月華新

毘陵舟中

行行驚歲暮孤棹滯天涯
遠岸經橋合寒流抱郭斜
何人分竹葉無使寄梅花
苦為微名累蕭蕭兩鬢華

南徐除夕

倚棹南徐下燕山北望遙
客程猶未半殘歲只今宵
鄉淚當孤燭愁心逐夜潮
高堂有白髮何意向雲霄

揚子江望金山寺

纔過揚子渡便覺氣蕭森
地勢分南北江流自古今
浪翻塔影動雲擁寺門陰
未慣風波苦空餘涕淚深

漂母廟

淮水流無盡荒城古廟存何人憐國士老嫗識王孫雖
有千金報寧酬一飯恩平生知己意難與世人言

任邱道中

馬足怯春霜燕山路正長生涯慚小草離緒寄衰楊白
骨新邱隴黃沙古戰場平安空有信來往少同鄉

李惟實過集客舍

擊筑過燕市逢君醉濁醪龍門叨御李蟲刻愧投桃歲

月虛長缺風塵暗大刀可憐燈影裏相對兩青袍

出都門懷程五表兄

獻策不得意呼童便束裝人皆悲失路我獨喜還鄉
拓落朝玄草驅馳愧綠楊歸尋河朔侶同擘荔枝香

游虎邱寺

一棹過蘭若齋心禮法華荒墳深踞虎古木亂栖鴉
寶塔凌空迥幽巖逗月斜生公講亭在何處有袈裟

同吳之衛馬雲卿飲張幼于曲水草堂

兩度過吳市今來得問竒
榻從花下設人在竹間窺
座客皆黃髮先生自白眉
名園依曲水芳宴共題詩

諧賞園別顧世卿

共醉尊中酒驚看別後顏
神龍分劍浦羸馬出陽關
園似遊金谷人如行玉山
相逢又相別空有淚潺湲

午日過江郎山

車度蒙茸裏侵衣樹色涼
土音聞越客山色見江郎
萍梗悲遊子菖蒲憶故鄉
龍舟何處競簫鼓斷人腸

至家

故里經年別，今朝慰倚閭。
關河空阻絕，歲月易居諸。
燕麥埋荒徑，鶯花老舊廬。
莫嫌金已盡，還有一囊書。

行脚僧

何年辭故院，足跡徧雲天。
有寺皆投宿，逢人便結緣。
木杯窮歲月，錫杖老風烟。
人境元成幻，行藏總是禪。

旱

入秋猶不雨，望已絕三農。
處處憂豺虎，村村祭土龍。
人

情皆憫歲天意豈乾封米價騰如此軍儲不罷供
上天未悔禍四野正皇皇溪澗水亦涸桔槔何處忙
求今正急誰敢議開倉苦乏謀生策須求辟穀方

嵩山寺贈淨上人

古寺門空閉青林紫衲僧風傳齋後磬雨暗座前燈
經不念中品禪能叅上乘夜深談半偈無愧佛圖澄

芝山寺逢游元封兼懷宗振

當年曾一面此夜遇禪居乍見不相識驚看鬢漸疎
阿

咸元自達癡叔竟何如
別後餘玄草毋忘寄敝廬

春興

入春纔數日春意滿疎林
苔補堦前色禽傳竹外音
山容開曉霽雲氣散輕陰
虛室無塵想泠然物外心

訪瀚上人

遁跡芝山寺長年不出龕
行深忘色相客至但和南
傳世燈千劫隨身經一函
無言即真意禪理豈須談

溪行晚眺

溪上欲黃昏潮平浪不翻鐘聲雲外寺燈影水邊村荒
坂牛羊下前林鳥雀喧桃花最深處莫是武陵源

清明客中寄惟起弟

迢遞京華路風塵多苦辛可憐三月暮又負一年春故
里鶯聲老天涯柳色新孤燈風雨夜憶汝倍傷神

同王玉生惟揚弟登劍州明翠閣因懷宗思兼
先生

高閣倚峻嶒年來幾度登危欄紫野竹怪石抱枯藤上

界空香墜前山翠色凝因思舊遊者望斷白雲層

王臺驛

古驛枕溪流羣山抱驛樓灘聲寒午夢鶯語動春愁芳
草王孫路桃花漁父舟白雲與流水相對共悠悠

舟行

空山駐夕陽山色更蒼茫隔岸蘋花白滿汀蘆葉黃寒
蟬抱樹咽金氣侵衣涼此際溪行者能無思故鄉

舟行正暮秋晚眺思悠悠驛路當溪斷漁家傍竹幽山

阿全隱寺石罅亂迴舟坐聽寒溪水潺湲日夜流

秋日同汝翔伯孺惟起集汝大山齋

高齋秋氣清殘暑坐來輕竹外商飈度松間天籟生一
杯桑落酒千載薜蘿盟我輩疎狂甚誰當嵇阮名

劍浦得幼孺書

別君經一年迢遞各雲天彼此有消息全憑書札傳鴈
飛九峰外夢到六溪邊把臂知何日開緘空惘然

病中遲陳道育不至

幽齋啼暮禽扶病自沉吟孤燭當殘夜疎鐘度遠林月
窺松隙小雲閉竹房深空有懷人意杳無車馬音

贈陳元之刺史

先生宗炳流山水臥中遊隱矣能自適澹然何所求
雲當日夢黃菊此時秋投老六溪上依稀如十洲

慰陳振狂失釣艇

一夜秋江漲聞君失釣航聲應停欵乃歌忽罷滄浪
荻岸空殘月蘆磯但夕陽遡迴知所去宛在水中央

枯纜何時絕飄然嘆斷蓬
豈知漁父柹翻作楚人弓
鶴侶今誰載鷗羣舊已空中
宵頻起望或有石尤風

青錢費幾緡買棹作漁人
岸火焚孤纜秋風罷釣綸
飄零疑海怪去住聽波臣
不返緣何事君其問水濱

歲暮懷鄭六初

忽忽歲云暮天涯客未還
夢迴瓜步月人隔秣陵關
驛路梅花瘦空齋竹影閒
何時理歸棹相對說青山

夜坐

空齋寒似水，獨坐倍淒然。
葉響林間雨，風聲竹杪泉。
應門雙鶴睡，照佛一燈懸。
暝色生蘿徑，飛來絕壑烟。

歲盡

范叔寒如此，其如復逼年。
文章能作祟，吾道合屯邅。
吏預催官稅，門多索子錢。
縱然貧到骨，不敢怨皇天。

苦雨

淫雨經旬月，蓬蒿掩敝廬。
飢鳥藏樹杪，行蟻徙階除。
天意高難問，雲遊跡漸疎。
山中蓑笠在，長日自揮鉏。

竟日雲陰合千峰雨脚連田禾爛欲死平陸潰成川竹
徑坐來惡蕉房聽可憐因之廢櫛沐白日枕書眠

九夏苦無雨冬來何太繁冥冥翻浪急莽莽塞天昏野
服霑松翠空墻繡蘚痕山齋幽寂甚愁緒豈堪論

約汝大汝翔振狂惟秦在杭藤山看梅

藤山梅萬樹冬盡一齊開粉面懷人瘦香魂入夢來翠
微將失色玉屑漸成堆昨得花神檄遲君共舉杯

梅塢餘殘雪疎枝冷不禁去招梁苑客同作灞橋吟十

里花為市千家玉作林
慎母披鶴氅樹裏恐難尋

同汝翔在杭看梅先宿蘆中磯

雪後尋梅塢蘆中問釣磯
榻同陳仲舉詩得謝玄暉
朔氣凝青幌寒香動翠微
前林春色好折得幾枝歸

白龍江上路五里即梅林
暫借蘆中宿同諧物外清
霜明竹屋涼月墜花陰
姑射僊人夢朝來不可尋

蘆中磯曉起喜汝大惟秦至

犬吠葦門前遙驚石榻眠
攜來雙竹杖穿破一林烟
袖

出梅花譜囊添麴米錢歲寒盟不負同醉白雲邊

曉起看梅

花神催曉夢枕上忽聞馨路指梅林白尊攜竹葉青蘿
衣沾宿露藜杖帶寒星積雪看如絮前村作杳冥

秋夜汝大見訪留酌

故人當夜至倒屣出相迎坐久詩情發霜寒酒力輕殘
更聽漸促微月欲西傾分手柴門寂惟聞天籟聲

哭同年黃紹馨孝廉

同領鄉書者才名君最先賦成栖鵬日筆絕獲麟年堂
有雙黃髮家無二頃田交情盡一哭淚洒寢門前

喜林逸民山人再至

相見各歡悲風光異昔時如何赤城客又赴白雲期情
以重來密詩從別後竒試看雙鬢裏添得幾莖絲

春日閒居

草閣春方暮裡陰日未斜蝸涎分斷壁鶯語共隣家曲
塢藏脩竹輕雲覆落花早栖有至性長此卧烟霞

茆屋依青嶂蒲團坐白雲
新茶燒竹煮老栢雜香焚壁
古苔紋見林深鳥語聞
冥心忘早晚花外已斜曛

一室通幽徑群峰列翠屏
空階半夜雨新竹幾行
青山果猿爭拾巖扉鶴自扃
花間聞剝啄客借太玄經

焚香坐翠微山色入荆扉
日午鳥啼歇門閒人跡稀
休糧孤鶴瘦積雨野蔬肥
欲識靜中意白雲天際飛

宿陳七吸江亭

高談當子夜人世幾今宵
共步蘆中月因歌竹外橋
孤

琴清澹露寒磬落歸潮此地堪栖隱頻來豈用招

烏石山贈僧

鷲嶺白雲邊茆庵只數椽
污泥皆淨土人境即諸天
山現空中色花明定後禪
蒲團今已爛趺坐不知年

風雨

風雨來何驟虛堂白晝陰
木催愁破屋巢落不歸禽
水入花畦亂雲埋竹塢深
殘虹開晚霽飛瀑滿遙岑

宿林熙工面壁洞

精舍錦溪東依然梵宇同一燈禪榻寂孤磬世緣空花
散諸天雨松生萬壑風池光與月色相對意無窮

古洞傍巖陰烟蘿一徑深白雲皆幻迹碧草自禪心日
午風旂影月明霜磬音已空人我相任是世人尋

同林熙吉鄧汝高游錦溪竹林

一路盡蒼苔濃陰晝不開山依迂澗轉泉逐斷橋來同
坐松間石還傾竹下杯隔溪烟磬晚欲別又遲回

水西遲陳伯孺不至

之子來何暮相思漫倚樓望窮平楚月魂斷錦溪流對
酒不成醉看雲何處留幾迴沙浦上數盡往來舟

送陳十二仲溱歸柯嶼幽居

憐君復失意別我向南還落日

關

渡春風柯嶼山馬

行青草遠人語綠楊閒歸去應垂釣溪流第幾灣

過白雲寺

尋僧到白雲便覺遠塵氛古道少人跡流鶯處處聞泉
聲歸澗寂山色過橋分坐聽疎鐘起空林正夕曛

送劉季德還嶺南

盡此一杯酒送君心
黯然魂飛瘴嶺外
路指海雲邊
春老花隨馬
潮平月到船
相思當後夜
閩粵異風烟

送張叔弢博士自永嘉還長溪

青羶坐未煖
白馬永嘉還
夢繞龍湫水
門當天姥山
悲風起渡口
落月傷離顏
一望一惆悵
思君空閉關

懷鄭四球客邊

仗劍干明主
心殊未休風
塵閩海夢
烟月薊門遊
相

憶坐與卧去家春又秋君懷棄繻志當斬樓蘭頭

送黃博士典試之楚

送汝正秋初河橋柳漸疎忽飛閩海鷁去食武昌魚湖
水連官驛湘雲擁使車聖朝方急士早上薦賢書

萬里楚天色君行意若何收將和氏璞聽遍郢人歌颿
影洞庭盡馬蹄衡岳多勝遊知有賦莫惜弔湘娥

送周喬卿

交驪纔半載歲晏復離羣馬上程三日囊中錢幾文行

藏元似寄世態總如雲莫笑吾貧甚梅花可贈君

歌者陳郎戲作姬妝即席調贈

梨園推麗質結束作妖姬妙舞風前合清歌雲外遲綵
衣裁袖窄翠鈿壓眉低何必悲黃鵠愁多貌不移

建溪中秋懷馬季聲諸子

對君不能歡鄉心有萬端青天一片月白社幾人看葉
落知林瘦溪深覺夜寒南飛見烏鵲何意獨凭欄

關門曉發

關門何處通路入亂雲中雞唱逐殘月馬蹄隨曉風泉
飛秋澗響葉盡暮山空感此封疆異離心誰與同

九日集張幼于曲水草堂

虛亭來爽氣秋色滿疎籬楚客紉蘭佩吳姬唱竹枝假
山遙對戶曲水暗通池不負登高興渾忘故國思

寄惟起弟

別來音信稀憶汝忽霑衣細雨孤帆遠長天一鴈微魂
隨青嶂斷夢與白雲違明歲黃花節知余歸未歸

許墅關逢王百谷

才作吳門別重逢在水涯青蚨沽綠酒彩鷁載黃花生
久潮初滿談深日易斜虎邱一片月相送到京華

金昌贈錢功父

半偈庵頭別春風又幾年相逢猶問姓感舊各茫然爾
我形容改江湖夢寐牽此心倍悲喜莫怪太留連

雲間旅情

一帆辭攜李兩日到雲間江路依松轉柴門映竹關顏

隨秋色老夢逐暮潮還忽聽華亭鶴悵然思舊山

京口夜泊遲陳大不至

落日橫京口停雲更黯然經旬同去住此夕異風烟目
斷寒蘆外魂銷短燭前榜歌頻起聽永夜不能眠

同彭正休陳子卿遊金山遇張函一孝廉閱壽

卿山人恩公若公

萬頃江如練中流湧翠微浪翻孤塔影雲戀定僧衣客
路同聲少空門聚首稀斜陽各南北惆悵水烟飛

同陳子卿過廣陵訪夏玄成吳叔嘉留飲席上
分得燈來二字

歲晚天涯客，孤舟度廣陵。
論交疑是夢，對酒喜如澗。
郭靜濤聲遠，天寒露氣凝。
不愁歸路黑，江上有漁燈。

客路逢知己，飄零未可哀。
凍雲依樹合，殘月隔花來。
喜對高陽侶，慚非鄴下才。
觀濤吾有賦，秉燭為君裁。

酬陸無從率爾見贈之作

陸氏機雲後，誰當夫子賢。
賦能工白雪，官已薄青氈。
地

僻門如水庭間草似烟蕪城分手處感激贈新篇

交河早發

京華望不極曉起戒行程馬怯霜橋路雞殘月店聲晨
光催斷角暝色破孤城此際栖栖者思鄉無限情

河間宵征

不盡風塵苦宵行路更難清霜蛩語急斜月馬蹄寒碇
搥閨心碎笳吹鄉夢殘驛樓看尚遠何處解征鞍

憶故園梅花

衰柳長途恨寒梅故國思微霜虛矮屋殘月冷疎籬隴
外人難寄林中客到誰藤山歡賞處又是隔年期

北地

北地非吾土重遊信可哀鴉聲喧白骨馬足起黃埃野
曠衰楊柳田荒變草萊江南風物好一望一徘徊

至京

客途勞役息帝里物華新馬踏交河月鶯傳上苑春曙
光開柳陌雲氣戀楓宸應待臨軒日抽毫賦大人

辛卯除夜姑蔑舟中

客路行無盡終天恨轉深乾坤烏鳥淚風雨狄猿吟爆
竹催殘臘梅花憶故林未能委溝壑聊慰北堂心

送郭士龍

送爾不能歌相看意若何離心寄雲水春夢隔關河草
色晴尤媚鶯聲暖漸和梁間懸榻在莫惜數來過

送葉廷蓋

我本倦遊者送君增苦顏潮聲螺女渡歸夢壺公山春

色鶯啼外行程鳥道間所嗟瑠樹遠何日更追攀

病中得王少文詩

山樓纔信宿偃卧各經旬負此看花約蹉跎欲暮春詩
從愁裡荅神向夢中親誰復憐同病相思長苦辛

哭張隱君

先令云亡日君猶慟哭過芝焚方自嘆薤露忽成歌者
舊鄉中少交遊夢裏多因之動淒楚腸斷更如何

與惟秦夜話因懷惟起客水西

春宵何太短忽忽已三更燈散疎林影蛩傳古砌聲談
深塵慮息坐久月華生為憶溪行者應含兩地情

寒食日熙吉玉生惟秦振狂伯孺少文集綠玉

齋

佳節逢寒食孤齋聚德星談應同稷下會可比蘭亭粥
煮楊花白尊浮竹葉青春光能有幾取醉莫教醒

喜興公弟遊方廣嵩歸

犬吠竹間扉遊山客乍歸杖頭嵐翠在衣上水簾飛路

入羚羊谷舟停鷗鷺磯
慚余多勝具此地却相違

石嵩廢寺

寺廢久無鐘
禪關掩萬峰
空廊惟卧虎
棄鉢不歸龍
塌埋殘碣苔深翳古松
倘非樵子引那識往來蹤

春暮送周喬卿

忽驚春已去
况復送君歸
別意有如此
前途花正飛
蟬聲風外急
山色雨中微
後夜看明月
相思獨掩扉

送林宗大之玉田

飛花滿驛亭送子出郊
垌馬影雲邊見蟬聲
雨後聽沙看兩岸
白山到五峰青
試向中宵望何人是客星

送陳道育下第歸玉融

憐汝復棄置歸尋海上山
相逢俱落魄何以破愁顏
古渡春流外孤城瘴霧間
離心當此夜空對白雲間

贈隱者

東郊稱大隱耕鑿古風存
水竹開三徑桃花自一村
閒心餘白髮生事寄青尊
愛爾幽棲處依稀似鹿門

贈漁者

不作風塵客生涯寄釣綸
江湖孤棹遠烟雨一竿貧
鼓枻同漁父藏名比富春
武陵溪尚在為我問迷津

夢

夢裏交驩者平生識面稀
贈香疑賈女解珮似江妃
錦水烟波濶巫山雲雨微
遽然驚醒處清淚滿羅衣

江上送惟起弟

別意孤帆遠行裝一劍貧
何堪哀痛後復際此風塵旅

館常懷母長途好愛身江干一杯酒相對總沾巾

送高廣文之蜀

金粟臺前別征帆夕照催猿聲巫峽聽馬帳錦城開閩
海風塵隔巴流日夜迴此鄉多俊彥若箇子雲才

蜀道難如此分攜思不窮秋風登劍閣夜月度蠶叢客
路憑羸馬離心寄斷鴻講堂聞尚在好去繼文翁

贈方伯書

風塵初識面尊酒罄交驩人已如玄度才能逼建安青

雲名不薄白雪和應難此別何時遇秋宵夢木蘭

得舍弟吳中書

汝別三旬久家書兩度看帆前江月迥馬首嶺雲殘路
遠愁裝薄秋高怯被寒孤身千里客若箇勸加餐

贈性言上人

多年坐沃洲此日伴師遊白社閒中夢丹楓客裏秋浣
衣江月冷扶杖嶺雲流欲證無生訣萍蹤不可留

南朝四百寺師在幾招提法以蓮花悟詩將貝葉題游

蹤闌海曲歸興秣陵西相見即相別秋風惜解攜

題徐氏池亭

名園依北郭避俗此盤桓鶴跡留苔徑鶯聲滿藥欄池
添春雨漲樓對暮山寒但得頻投轄相過意未闌

桃源何處所此地即仙家林密藏春靄樓虛納晚霞輕
風三徑竹微月一庭花晏坐塵心遠寒塘獨聽蛙

懷惟起弟

遠客憐吾弟離愁有阿兄久無鴻雁信空聽鶴鴒聲歲

月三秋晚寒溫兩地情山齋長寂寞日日計歸程

碧山菴逢亮上人

清溪帶遠山曲徑入松關客以叅禪至僧當乞食還一
瓢秋色澹孤磬夕陽間別去仍回首禪房雲氣間

送李驛使之官雷陽

驅馬將何適微官傍海涯公庭饒蜃氣墟落半蠻家路
指羊城入山隣象郡賒地偏少束帶高枕咏皇華

過挹翠亭

精舍祇園近，翛然遠市喧。
山光隔竹少，月色傍花繁。
松影搖虛閣，蘿陰翳短垣。
小舫時可泛，彷彿武陵源。

九日大風雨與黃道晦陳惟秦飲屋後小山

九日忽風雨，登高事已非。
秋聲繁灌木，商意薄輕衣。
衆壑浮青靄，千峰失翠微。
小山培塿甚，吟眺亦忘歸。

得朗公詩却寄

真僧雖出世，蹤跡尚人羣。
妙法登壇演，名香入定焚。
樓含孤嶂月，衲掛半溪雲。
千里封題寄，新詩過所聞。

哭林文烈

十載神交舊年來倍憶君每疑音問濶誰謂死生分
識面真無日浮生總似雲難將知己淚一洒故人墳
相違三百里消息太茫然對月思玄度披圖憶輞川
計來當此日死去自何年墓木今成拱纔歌薤露篇

得寧夏消息

叛卒雄心舊元戎血刃新中原多戍壘邊郡半征塵
時事何旁干吾生實不辰願聞烽火息老作太平人

亂離猶未定百姓夜虛驚官府勾丁壯鄉間練甲兵笳
聲吹隴水殺氣暗邊城不識書生輩何人敢請纓

至日對客

葭管灰初動殘花滿故籬誰知開徑日正是閉關時短
晷閨中線生涯鏡裏絲相逢聊一醉莫問歲華馳

渡峴江訪林熙吉

江路當殘雪斜陽滿客木林疎村店出浪急釣船稀遠
嶼臨流斷罡風到岸微炊烟看漸近何處是魚磯

青山兩岸濶一葉度空江
叫雁雲中獨浮鷗浪裏雙
霜花飄野渡水氣拍船窓
漁唱來前浦隨風自有腔

旗山勾漏洞

溪山何逶迤數里入鴻濛
斜日猿聲外殘雲鳥道中
亂峰諸洞隱萬竹一泉通
跌坐松間石塵心覺盡空

丹成不記年古洞白雲邊
衆水爭趨壑孤峰欲接天
路危逢亂石山盡見平田
日暮休歸去還期遇葛仙

葛仙何處去勾漏訪遺蹤
陟嶽齊攀竹聽泉獨倚松
石

林荒蘚合丹竈薄雲封轉入深林外前山又一重
仙都在人境一步一崑巒怪石各有態脩篁難計竿松
烟燒處煖蘿磴坐來寒別去仍回首餘生幾度看

瀨下晚泛

一水平如鏡西風晚度時茅茨爇鬼火榛莽翳神祠潮
勢衝溪盡峰形過瀨竒山川勞應接進艇不嫌遲

登岸

蘭若知何處躋攀尚數程逢沙愁瀨淺登岸得舟輕古

石莓苔色空林猿鳥聲除將樵採者更有幾人行

山行

脩竹夾籃輿嵐光欲染裾小橋流水急古路凍雲疎
村屋乘冬結山田隔歲鋤空林聞犬吠不異武陵居

放船

孤舟迴亂石流水響潺湲漁網蒹葭外人烟竹栢間斷
雲迷晚渚殘照下秋山遠寺昏鐘起樵歌出谷還

贈潮上人

真僧住洞天苦行已多年說法苔衣上安禪瀑布邊
餐千澗月衲掛半林烟夜靜諸緣息跏趺久不眠

贈波上人

隨師居淨土禮佛向空門夜半磬猶擊旬中髮幾髭
蒲團同鶴睡貝葉借猿翻壁掛袈裟濕因過雪裏村

別方廣巖

靈境探應徧言尋舊路歸殷勤記崑石惆悵別林扉
出洞寺全隱下山泉漸微行行頻矯首人世到來稀

春日曉起

山色猶含暝柴門逐曉開
流星墜高柳濕霧隱殘梅
出谷鶯聲冷巢林鶴夢迴
無緣獨吟眺春意滿莓苔

送鄭承武之東魯

送君當此去匹馬向東阿
夜淚燈前盡春愁夢裏多
亂雲過泗水斜日下黃河
雖有遠遊興能無思薜蘿

惜別意何長鶯聲滿夕陽
殘碑問鄒嶧遺殿弔靈光
下馬多新店逢人少故鄉
歸期須及早莫待寄衣裳

晚至石竹山

尋真當薄暮暝色滿松關絕壁猿聲斷遙空鶴影還雲
邊春草路天際夕陽山應識仙都近鐘聲杳靄間

月夜度石梁登摘星臺

四野蒼烟暝千峰夕照催踏茲明月影獨上摘星臺山
自鴻濛剖人從鳥道來石梁稱險絕不用說天台

贈岩上人

昔住毘盧殿今居石竹山春雲禪衲煖夜月梵鐘閒香

積供粗飯禪房倩鶴關平生愛空寂相對欲忘還

石竺山遲陳道育不至

正苦經年別終違數里程談應虛玉塵夢已斷瑤笙報
客空勞鶴懷人獨聽鶯一燈松影裏吟卧若為情

讀顧道行先生碑刻

使者登攀處春風又幾年詩留孤嶂裏人老五湖邊
屐齒埋荒蘚碑棱隱斷烟摩厓愜幽賞惆悵隔山川

東郊晚行

出郭高春後郊原起夕陰
山山曳殘雨步步響新禽
老樹莓苔厚空林紫翠深
招提何處所雲際有鐘音

湧泉廢寺

古寺荒涼久淒然感廢興殘灰六十載
破衲兩三僧點鼠據香積妖狐吹佛燈
黃金重布地不識有誰能

淨室已丘墟荆榛久未除
空山樵子路前代梵王居
石柱頽殘後金身煨燼餘
披雲尋故址一步一躊躇

喝水岩贈瓢菴頭陀

何年此卓錫鐘磬度昏朝瀑水引歸鉢茅菴結似瓢躡
雲雙草屨坐月一團焦隔寺有禪侶相尋不憚遙

靈源洞懷振狂在杭

南郭人何處東山屐已非春風憶茗水夜月夢蘆磯以
我招尋慣如君同調稀摩挲舊題刻空見白雲飛

擬送僧歸日本

遠指扶桑外龍宮是紺園慈航尋海舶晨磬待朝暎已
悟西方教漸通中國言懸知無佛處師去定稱尊

遙天迷去住但看指南車重譯同歸舶陽侯護法書颯
風心自定海怪呪堪除此去無禪侶應尋絕島居

歸程兼晝夜天水共微茫但指日出處此中吾故鄉皈
依多獠獠供養有夷王遙想珠龕下常焚異國香

別去上星槎滄溟道路賒夷音宜呪唄左衽自袈裟演
法從天竺傳燈到海涯不知千劫裏何劫到中華

病僧

苦厄那能度醫王亦抱疴苔侵雙屐濕塵翳一瓢多錫

杖頻扶手金剛為伏魔
跏趺在禪榻或恐是維摩
聞鐘苦夜長形影自淒涼
懺悔除前障呻吟檢古方
坐非同面壁卧豈倦津梁
氣運有時盡千花塔裏藏

集鄭氏烏石別墅

衆山環曲徑亂竹掩衡門
塔影雲中寺人烟郭外村
新蟬喧白晝歸鳥報黃昏
此地清幽甚依稀似習園
雖是居城市却無城市喧
僧歸殘雨寺樵度隔雲村
花落鳥聲歇草多螢火繁
斜陽人散後留鶴守柴門

法雲寺對月

空界雲陰歛祇園月色澄
光生初動磬影送未歸僧
入水悟禪意照林疑佛燈
更闌縱吟眺衣上露華凝

挽陳太學

龍駕南巡日何人批逆鱗
誰知伏闕者却是布衣臣
抗疏青雲薄憂時白髮新
至今遺廟在蘋藻自千春
欲迴江漢輦痛哭叩重闈
死諫孤臣節生還聖主恩
青山藏疏草白日照忠魂
寂寞荒墳上西風啼暮猿

樹下禪僧

跏趺依古樹，偃息對峰陰。
草屨莓苔濕，麻衣烟靄深。
猿啼知定性，葉落見禪心。
明日隨緣去，遊蹤何處尋。
老樹不知年，無言息樹邊。
著頭多雀穢，徧體有蝸涎。
木葉寒時佩，花裯定後眠。
月中行客過，疑是野狐禪。

過鄭吏部墓

荒墳不計年，過客淚潸然。
朽骨藏於此，吟魂何處邊。
野狐啼暮雨，石馬卧秋烟。
安得斯人起，重令大雅傳。

西郭塚纍纍經過下馬誰先生一抔土詞客百年悲
護將崩石苔封未斷碑應知靈爽在歎我不同時

贈史使君

風流史使君三載竹符分吏舍積青草公庭生白雲
山城有絃誦瘴海無妖氛父老關門送不持錢一文
一麾初出守三十已專城露冕諸侯貴攀轅百姓情
貧難養鶴庭靜但聞鶯試看長溪水惟君能共清

贈黃生懋政

憐君湖海客寄迹少年場音律周公瑾丹青顧長康俠
常彈短劍貧不厭空囊名姓應難問多於酒肆藏

過鄭君大白雲莊

何處辨山家輕雲處處遮亂峰圍拱木一徑入梅花草
榻依林設柴門逐水斜主人無所事杯酒送年華

晚泊七里灘

寒雲生近浦落日滿前汀旅夢驚潮破漁歌過瀨停一
竿秋水碧孤棹晚山青向夕推篷望中天見客星

山中古廟

山深香火微廟宇冷斜暉壁古龍蛇暗厨荒鼠雀饑歲
時村婦拜水旱土人祈簫鼓田間過知為祭賽歸

一路人烟絕空山見古壇鼎存周款識像塑漢衣冠鳥
跡殘碑篆虬枝老樹蟠可憐年代久風雨廟門寒

古廟白雲邊神粧尚儼然靈應山鬼託龕任野狐眠開
初知何代銷沉不計年居民流竄盡累歲斷香烟

元直秀才觀微上人過宿

風流看許掾定慧得支公白社當年結清言此夕同亂
蛩吟竹塢一犬吠花叢相對殘燈下能令塵慮空

送翰上人遊越

師行無定蹤此去路千重投宿月中寺經過雪裏峰間
身臨水衲禪意隔潮鐘明歲西湖上相尋九里松

雖云遊浙水未必浙中遊遇客皆為侶逢山便可留獨
行半風雪一別幾春秋所惜談詩夜從今少惠休

真僧欲度世豈肯倦津梁白足他山月緇衣滿路霜一

燈傳異代六祖是同鄉此去逢行脚新詩好寄將

得譚比部寄先永寧書感而賦答

淒風生敝廬忽枉故人書不復知存沒猶然問起居一
絨千里外雙淚幾年餘孔李通家舊母令魚雁疎

送危博士之官馬平

茫茫江水濶相送片帆孤炎海川途遠蠻天氣候殊瘴
烟發青草雲樹黯蒼梧想到談經日三鱸墜有無

送陸畫師還錢塘

客懷當暮冬去矣不從容草屨千峰雪柴門九里松貧
惟安豹隱老任笑龍鍾為問經行處雲山貌幾重

岫山看梅過曾文表墓

一路盡氤氳看花倍憶君白楊知己淚宿草故人墳樹
影含殘照猿聲哭暮雲淒涼身後事地下可能聞

送楊太學之金陵

勞歌動別筵酒散各雲天折柳當春暮看花正少年鶯
聲孤店月草色六朝烟無限懷人意金陵何處邊

故黎平太守袁公輓歌

永別城中路新成郭外墳旒題前太守書失右將軍廣
柳驅殘月甘棠翳暮雲應知千載後不朽是遺文

誰知五馬客竟作九原人出郭有魂氣還家惟影神墓
中難待曉地下不行春斯世無同調悲歌淚滿巾

白馬出闕門愁聞鼓吹喧山靈收正氣月色引歸魂貴
至二千石書餘幾萬言翩翩丹旒過猶訝轉朱轡

赤紱人何處青山骨可藏鄉隣悲道路父老泣蠻方圖

史虛東壁松楸冷北邙明君思起草猶問秘書郎

林伯儀自金陵還莆過訪話別

為客經淮楚歸途訪索居雲山一騎遠烟柳六朝疎問
路知鄉近還家及歲除陸生裝薄甚惟有一囊書

癸巳除夕

又見韶華換空為老大悲齒添新歲歷酒祭一年詩流
落憂前路歡娛憶少時生憎簫管惡苦向隔鄰吹

送鄧汝高進士還朝

獻歲赴王程全家向北平
斷冰淮口渡殘雪薊門城
烟柳迷征蓋風花引使旌
長安春色好莫起故園情
柳色催離况椒花戀別筵
夢繁人去後春到客行先
掛蓆河通楚驅車路向燕
相思明月夜惆悵隔山川

遊通谷洞

小徑斜通谷躋攀及晚晴
草荒尋鳥道磴險作蛇行
暮色千峰合春流一鏡平
石間舊題刻半是紫苔生

登烏石山

絕巘分青靄，高臺接絳霄。
鐘聲多近寺，墨蹟半前朝。
徑小疑藏洞，山窮忽遇橋。
憑欄時縱目，滄海望中遙。

同微師至面壁洞

竹徑雲陰亂，松門夜色虛。
佛多同客禮，洞半借僧居。
幡動風來後，鐘殘月上初。
何須別栖隱，此地即吾廬。

題惟揚弟法雲寺書舍

誰知菩薩界，亦有子雲居。
厨趁僧炊後，膏分佛照餘。
窓窺施食鳥，筍竄蠹經魚。
方衲時相叩，祇應來借書。

絕粒僧

苦行凡心絕，休糧道氣清。
齋惟供弟子，食不乞王城。
已覺形骸幻，能令香味輕。
雲遊經處處，不用載瓢行。

送顏廷愉將軍料兵海壇山

少年初建節，走馬向孤城。
蜃氣雲中市，狼烟海上營。
曉霜明雪戟，夜月捲霓旌。
幕府防秋急，看君獨請纓。

同微公元直興公弟至鼓山

看山俗慮清，况復與僧行。
徑密草交色，林迴鳥換聲。
披

雲孤衲重掛月一瓢輕不用憂迷路燈光見化城

鼓山寺

空門有夙因歲歲往來頻
方丈墨猶濕祇園花又新
佛應憐熟客山但借閒人
不分居城市紅塵老此身

靈源洞與微公賦

洞藏青嶂裏路出白雲層
苔色侵禪榻松陰暗佛燈
樹撐危石墜藤束古崖崩
不用尋僧語同遊自有僧

趙用拙招遊白雲洞迷路而返却寄

古洞知何處山僧路亦迷
行來千嶂外猶隔數峰西
徑險猿難度林深鳥自啼
漁郎真夢境浪說武陵谿

喜果慧禪師見訪

多年居古洞偶爾到王城
老益禪心定貧諳世諦輕
空猶嫌有相火久斷無明
再拜求真偈流傳度衆生

贈趙用拙居士


留髮不披緇行藏衆所疑
慧因聞道早壯悔出家遲
果以今生滿僧應夙世為懸
知他日遇改却舊鬚眉

問伯孺病

時事已如此看君轉自愁不堪燃桂苦况抱采薪憂樂
以何錢買糧應幾日休妻兒皮骨在相向淚交流

贈張少府

戀越終辭楚幽栖似鹿門烟霞長作侶車馬不聞喧世
事惟高枕生涯只灌園自耽泉石趣豈是學桃源
黑髮棄軒冕歸畊南畝田不飛雲外鳥時拄杖頭錢野
性耽丘壑幽居遠市廛中峰高隱處長抱白雲眠



幔亭集卷五